

摘藻堂四庫全書薈要

子部

欽定四庫全書薈要

子部

欽定授時通考卷二十

三五

詳校官主事<sub>臣</sub>陳本



欽定四庫全書薈要卷一萬六千八百八十六

子部

欽定授時通考卷二十三

穀種



稷

梁

梁



禮記曲禮梁曰薺其

注薺辭也疏正義曰梁謂白梁黃梁也薺語助也

周禮天官食醫凡會膳食之宜犬宜梁

正義犬味酸而溫梁米味甘而微寒氣味相成訂義  
犬金獸也梁西方之穀與金畜相宜

爾雅薺赤苗

注今之赤梁粟

又芑白苗

注今之白梁粟皆好穀疏案詩大雅生民云誕降嘉種維秬維秠維糜維芑故此釋之也芑與糜音義同芑即嘉穀赤苗者郭云今之赤梁粟芑即嘉穀白苗者郭云今之白梁粟皆好穀也

博雅藿梁木稷也

廣志有具梁解梁有遼東赤梁鹽鑽梁粒如蟻子魏文帝以為粥

爾雅翼梁今之粟類古不以粟為穀之名但米之有稭

穀者皆稱粟今人以穀之最細而圓者為粟則粱是其類內則曰飯黍稷稻粱白黍黃粱稭樵說者曰下言白黍則上是黃黍下言黃粱則上是白粱今粱有三種青粱穀穗有毛粒青米亦微青而細於黃白米也夏月食之極為清涼但以味短色惡不如黃白粱故人少種之亦早熟而收少作餲清白勝餘米黃粱穗大毛長穀米俱麤於白粱而收子少不耐水旱食之香味美於諸粱人號為竹根黃白粱穗亦大毛多而長穀麤扁長不似

粟圓米亦白而大其香美為黃粱之亞古天子之飯所以有白粱黃粱者明取黃白二種耳今人大抵多種粟而少種粱以其損地力而收穫少耳然古無粟名則是以粱統粟今粟與粱功用亦無別明非二物也粱比他穀最益胃但性微寒其聲為涼蓋是亦借涼音如許叔重說黍大暑而種則以黍從暑粱從涼其義一也

農政全書王禎曰赤白粱其禾莖葉似粟粒差大其穗帶毛芒牛馬皆不食與粟同時熟



本草綱目李時珍曰梁者良也穀之良者也或云種出自梁州或云梁米性涼故名皆各執已見也梁即粟也考之周禮九穀六穀之名有梁無粟可知矣自漢以後始以大而毛長者為梁細而毛短者為粟今則通呼為粟而梁之名反隱矣今世俗稱粟中之大穗長芒粗粒而有紅毛白毛黃毛之品者即梁也黃白青赤亦隨色命名耳郭義恭廣志有解梁貝梁遼東赤梁之名乃因地命名也 陶弘景曰凡云梁米皆是粟類惟其芽頭

色異為分別耳汜勝之云梁是秣粟則不爾也黃梁出青冀州東間不見有白梁處處有之襄陽竹根者為佳青梁江東少有又漢中一種象梁粒如粟而皮黑可食釀酒甚消痰蘇恭曰梁雖粟類細論則別黃梁出蜀漢商祈間穗大毛長穀米俱麤於白梁而收子少不耐水旱食之香美勝於諸梁人號竹根黃陶以竹根為白梁非矣白梁穗大多毛且長而穀粗扁長不似粟圓也米亦白而大食之香美亞於黃梁青梁穀穗有毛而粒

青米亦微青而細於黃白梁其粒似青稞而少粗早熟而收薄夏月食之極為清涼但味短色惡不如黃白梁故人少種之作餽清白勝於餘米 寇宗奭曰黃梁白梁西洛農家多種為飯尤佳餘用不甚相宜

又黃梁米氣味甘平無毒寇宗奭曰青梁白梁性皆微涼獨黃梁性味甘平豈非得土之中和氣多耶蘇頌曰諸梁比之他穀最益脾胃

又白梁米氣味甘微寒無毒李時珍曰炊飯食之和

止煩渴

又青粱米氣味甘微寒無毒李時珍曰今粟中有大而青黑色者是也其穀芒多米少稟受金水之氣其性最涼而宜病人

直省志書 歷城縣方產粱俗云粱穀米可入祀品

鄒平縣物產白穀粒白圓大俗謂粱穀米 滋陽縣物

產粱有黃白紅黑四種 鄒縣物產粱有黃白紅黑四

種 沂州物產粱有黃白紅黑四種 昌邑縣物產粱

黃白二種 祁縣物產梁細粒而色白 馬邑縣土產

梁有早晚大小及紫白之異種 臨潁縣物產青梁白

梁黃梁 咸陽縣物產梁其米青者為青梁夏日食之

清涼其米白者形如芝蔴為芝蔴梁黃梁穗大毛長味

美謂之竹根黃然赤黃二種甲稭雖有二色而其米皆

白 慶陽府物產梁黃白青紅龍爪羊角蠟燭芝蔴長

角凡九種 長泰縣物產梁俗呼好殼即香糯青梁穗

有毛米微青頗長黃梁穗大毛長米畧麤白梁穗大米

扁長又有八畝者米赤大於諸梁更香北方無此穀以  
糯稷白者為梁非是



稷





禮記曲禮稷曰明粢

疏正義曰稷粟也明白也言此祭祀明白粢也尚書云黍稷非馨詩云我黍與與我稷翼翼為酒為食以享以祀黍稷為五穀之主是粢盛之貴

周禮天官食醫凡會膳食之宜豕宜稷

正義獮豕味酸牝豕味苦稷米味甘甘苦相成訂義豕水畜也稷北方之穀與水相宜

夏官職方氏正西曰雍州其穀宜黍稷

又河內曰冀州其穀宜黍稷

爾雅粱稷

注今江東人呼粟為粱疏左傳云粱食不鑿粱者稷也曲禮云稷曰明粱是也郭云今江東人呼粟為粱然則粱也稷也粟也正是一物而本草稷米在下品別有粟米在中品又似二物故先儒甚疑焉

尚書帝命期春鳥星昏中以種稷

說文稷五穀之長也糜稭也

月令章句稷秋種夏熟歷四時備陰陽穀之貴者  
博雅稷穰謂之稊

廣志破藏稷逼黍稷也此二者以四月熟

隋書稷五星稷農政也取乎百穀之長以為號也

宋史天文志天稷五星在七星南農政也取百穀之長  
以為號明則歲豐暗或不具為饑移徙天下荒歉客星  
入之有祠事於內出有祠事於國外

爾雅翼稷者五穀之長故陶唐之世名農官為后稷其

祀五穀之神與社相配亦以稷為名以為五穀不可偏  
祭祭其長以該之稷所以為五穀之長者以其中央之  
穀月令中央土食稷與牛五行土為尊故五穀稷為長  
又古者號稷為首種孟春行冬令則雪霜大摯首種不  
入蔡邕以首種為麥以麥常隔歲而種故以為首而鄭  
康成以為稷者蓋以考靈耀云日中星鳥可以種稷是  
一歲之初所先種者唯稷况又孟春正種稷之時而云  
首種不入即是極寒種不入土不待歲收然後為入也

稷又名齊或為粢故祭祀之號稷曰明粢而言粢盛者  
本之諸穀因皆有粢名小宗伯所謂辨六齋之名物與  
其用是也杜子春又欲讀酒正五齊皆為粢以禮運有  
粢醑在堂意以粢穀為醑則餘四齊亦皆以粢穀為之  
然破五齊從一粢於義不可故後鄭但以為齊者以度  
量節作之更讀禮運粢醑為齊此說之不同者也稷又  
名為稭呂氏春秋曰飯之美者有陽山之稭高誘曰關  
西謂之糜冀州謂之粢說文糜稭也廣雅曰粢稭也穆

天子傳曰赤烏之人獻稌百載見今人皆謂之稌然則稷也粱也稌也特語音有輕重耳大抵塞北最多如黍黑色稷有二種一黃白一紫黑紫黑者芑有毛北人呼為烏禾今人不甚珍此惟祠事用之農家種之以備他穀不熟為糧

音釋六齋音粱謂之六穀黍稷稻粱麥苽五齊音劑謂泛醴醕音醴糟牀下酒赤色

天中記稷又名為稌

農政全書賈思勰曰穀者總名非止為粟也然今人專以稷為穀蓋俗名之耳朱穀高居黃劉豬豬道慈黃聒

穀黃雀懊黃續命黃百日糧有起婦黃辱稻糧奴子場  
音加支穀焦金黃鵲鳴合履今一名麥爭場此十四種  
早熟耐旱免蟲聒穀黃辱稻糧二種味美今墮車下馬  
看白羣羊懸蛇赤尾龍虎黃雀民漆馬洩韁劉豬赤李  
穀黃河摩糧東海黃石駢威青莖青黑好黃陌南木隈  
隄黃宋黃癡指張黃兔肱青惠日黃寫風赤一睨黃山  
鹺頓黨黃此二十四種穗皆有毛耐風兔雀暴一睨黃  
一種易春寶珠黃俗得白張鄰黃白鹺穀釣干黃張蟻

白眼虎黃都奴赤茄蘆黃熏豬赤魏爽黃白莖青竹根  
青調母梁磊環黃劉沙白憎延黃赤梁穀靈忽黃獺尾  
青續得黃得客青孫延黃豬矢煙熏黃樂婢青平壽黃  
鹿樞白齧折作黃覃糝阿居黃赤巴梁鹿蹄黃鉞狗倉  
可憐黃米穀鹿樞青阿返比三十八種中麕大穀白齧  
穀調母梁二種味美擇穀青阿居黃豬矢青有二種味  
惡黃覃糝樂婢青二種易春竹葉青石柳閱竹根青一  
名胡穀水黑穀忽泥青衝天棒雉子青鴟脚穀鴈頸青



攬堆黃青子規此十種晚熟耐蟲災則盡矣徐光啓曰  
古所謂黍今亦稱黍或稱黃米稭則黍之別種也今人  
以音近誤稱為稷古所謂稷通稱謂穀或稱粟梁與秫  
則稷之別種也今人亦概稱為穀物之廣生而利用者  
皆以其公名名之如古今皆稱稷為穀也晉人稱蔓菁  
為菜吳人稱棗為菓稱陵苕為草洛陽稱牡丹為花又  
曰稭之苗葉莖穗與黍不異經典初不及稭後世農書  
輒以黍稭並稱故稭者黍之別種也郭璞注爾雅藿赤

梁粟芑白梁粟皆好穀也言梁又言粟言穀故梁者稷之別種也廣志曰秫黏粟說文曰秫稷之黏者故秫亦稷之別種也凡黏穀皆可為酒秬黍黏故人以為酒秫者黏稷亦可為酒故陶潛種五十畝秫非今之蜀秫也雜陰陽書稷生於東或楊九十日秀秀後六十日成羣芳譜稷粒如粟而光滑色紅黃米似粟米而稍大色黃鮮三月種耘四遍七月熟四五月亦可種但收少遲耳刈稷欲早八九月熟便刈遇風即落忌與瓠子附子

# 同食

本草綱目李時珍曰稷從禾從畎音即諧聲也又進力治稼也詩云畎畎良耜是矣種稷者必畎畎進力也南人承北音呼稷為稭謂其米可供祭也禮記祭宗廟稷曰明粢爾雅云粢稷也羅願云稷稭粢皆一物語音之輕重耳赤者名縻白者名芑黑者名秬註見黍下

陶弘景曰稷米人亦不識書記多云黍與稷相似又註黍米云稭米與黍米相似而粒殊大說文云稷乃五穀

長田正也此乃官名非穀號也先儒以稷為粟類或言  
粟之上者皆說其義而不知其實也按汜勝之種植書  
有黍不言稷本草有稷不載稭稭即稷也楚人謂之稷  
關中謂之糜呼其米為黃米其苗與黍同類故呼黍為  
私秣陶言與黍相似者得之矣 陳藏器曰稷稭一物  
也塞北最多如黍黑色 孟詵曰稷在八穀之中最為  
下苗黍乃作酒此乃作飯用之殊途 蘇頌曰稷米出  
粟處皆能種之今人不甚珍此惟祠祀用之農家惟以

備他穀之不熟則為糧耳 寇宗奭曰稷米今謂之稌

米先諸米熟其香可愛故取以供祭祀然發故疾只堪  
作飯不黏其味淡 李時珍曰稷與黍一類二種也黏

者為黍不黏者為稷稷可作飯黍可釀酒猶稻之有粳  
與糯也陳藏器獨指黑黍為稷亦偏矣稷黍之苗似粟  
而低小有毛結子成枝而殊散其粒如粟而光滑三月  
下種五六月可收亦有七八月收者其色有赤白黃黑  
數種黑者禾稍高今俗通呼為黍子不復呼稷矣北邊

地寒種之有補河西出者顆粒尤硬稷熟最早作飯陳  
爽香美為五穀之長而屬土吳瑞曰稷苗似蘆粒亦大  
南人呼為蘆稷孫炎正義云稷即粟也 又曰稷黍之  
苗雖頗似粟而結子不同粟穗叢聚攢簇稷黍之粒疏  
散成枝孫氏謂稷為粟誤矣蘆稷即蜀黍也其莖苗高  
大如蘆而今之祭祀者不知稷即黍之不黏者往往以  
蘆稷為稷故吳氏亦襲其誤也今並正之

又稷米氣味甘寒無毒別錄曰益氣補不足心鏡曰作

飯食安中利胃宜脾李時珍曰涼血解暑按孫真人云  
稷脾之穀也脾病宜食之汜勝之云燒黍稷則瓠死此  
物性相制也稷米黍穰能解苦瓠之毒

閩書稷說文曰五穀之長也閩中種稷殊少惟明祀用  
之甌冶遺事稌米與黍相似而粒大按此說是蜀黍也  
北人曰高粱泉曰番黍浙人曰蘆稌閩中山畚礮地尚  
有一種穗如鴨脚粒與黍相類磨之可以麪其稌可以

酒

天工開物凡糧食米而不粉者種類甚多相去數百里則色味形質隨方而變大同小異千百其名北人唯以大米呼粳稻而其餘概以小米名之凡黍與稷同類梁與粟同類黍有黏有不黏黏者為酒稷有粳無黏凡黏黍黏粟統名曰秣非二種外更有秣也黍色赤白黃黑皆有而或專以黑色為稷未是至以稷米為先他穀熟堪供祭祀則當以早熟者為稷則近之矣凡黍在詩書有豐芑秬秠等名在今方語有牛毛燕頤馬革驢皮稻



尾等名種以三月為上時五月熟四月為中時七月熟五月為下時八月熟揚花結穗總與來至不相見也凡黍粒大小總是土地肥磽時令害育宋儒拘定以某方黍定律未是也凡粟與粱統名黃米黏粟可為酒而蘆粟一種名曰高粱者以其身高七尺如蘆荻也粱粟種類名號之多視黍稷尤甚其命名或因姓氏山水或以形似時令總之不可枚舉山東人唯以穀子呼之併不知粱粟之名也以上四米皆春種秋穫耕耨之法與來

年同而種收之候則相懸絕云

直省志書宛平縣物產稷有黑白黃三種 保定縣土

產稷有紅有白有黑 歷城縣方產稷祀神多需此

鄒平縣物產稷紅白數種 新城縣物產稷紅稷黑稷

二種 齊東縣物產稷紅白數種 長清縣物產稷有

紅黃黑白四種 泰安州物產稷黃黑二種 萊蕪縣

物產稷有黃紅二種 霑化縣物產稷之品紅稷黑稷

柳稷六十日 滋陽縣物產稷有黑白二種 鄒縣物

產稷有紅白二種 鉅野縣物產稷有紅白二種 東

平州物產稷紅黑二種 汶上縣物產稷有黑白二種

沂州物產稷有黑白二種 清平縣物產稷有黑白

紅三種 高唐州物產稷其品二黑紅 觀城縣物產

稷紅黑二種 日照縣物產稷有黑白二種 招遠縣

物產稷其色有赤白黃黑數種 陽曲縣物產稷粟有

軟硬二種 祁縣物產稷有大小二種視他方味美

定襄縣物產稷青黃黑 臨汾縣物產稷有大小二

種視他方味美 翼城縣物產稷有赤黑二種 汾西

縣土產稷黃白黑三種 馬邑縣物產稷有青紅白黑

四種與早晚大小之分 涇川縣物產稷有黃白二種

輝縣物產稷色有青白紅黃名有六月私溜沙白等

皆嘉他如龍爪兔蹄雞腸鼠尾隨象立名動以百計

慶陽府物產稷黃白紅青鰲輓凡六種 歙縣物產稷

有黑稷者私稷也赤稷者糯稷也長如蘆葦號蘆稷黃

稷皆古之稷也



欽定授時通考卷二十三

欽定四庫全書薈要卷一萬六百八十七

子部

欽定授時通考卷二十四

穀種

黍

黍

丹黍米

蜀黍

玉蜀黍

野黍





黍



禮記曲禮黍曰薌合

疏正義曰黍曰薌合者夫穀秣者曰黍秣既軟而相合氣息又香故曰薌合也集說黍熟則黏聚不散其氣又香故曰薌合

周禮天官食醫凡會饌食之宜羊宜黍

正義羊味甘熱黍味苦溫甘苦相成訂義羊火畜也正黍高燥所生與火畜相宜

又夏官職方氏正西曰雍州其穀宜黍稷

又河內曰冀州其穀宜黍稷

爾雅秬黑黍

注詩曰維秬維秠

又秠一稭二米

注此亦黑黍但中米異耳漢和帝時任城生黑黍或三四實實二米得黍三斛八斗是疏李巡曰黑黍一名秬黍秬即黑黍之大名也秬是黑黍之中一稭有二米者別名為秠若然秬秠皆黑黍矣而春官鬯人

註云釀秬為酒秬如黑黍一秬二米言如者以黑黍一米者多秬為正稱二米則秬中之異故言如以明秬有二等也秬有二等則一米亦可為酒鬯人之註必言二米者以宗廟之祭惟裸為重二米嘉異之物鬯酒宜用之故以二米解鬯其實秬是大名故云釀秬為酒此云秬一秬二米鬯人註云一秬二米不同者鄭志答張逸云秬即皮其秬亦皮也爾雅重言以曉人然則秬秬古今語之異故鄭引此文以秬為秬

也漢和帝時任城縣生黑黍或三四實實二米得黍  
三斛八斗是也

尚書考靈曜夏火星昏中可以種黍

春秋說題辭精移火轉生黍夏出秋改黍者縮也故其  
立字禾入米為黍酒以扶老

春秋佐助期黍神名侑佞姓蘭郝

孝經援神契黑墳宜黍麥

淮南子渭水多力而宜黍

博雅黍稷也黍釀謂之秬

說文以大暑而種故謂之黍黍禾屬黏者也孔子曰黍  
可以為酒

古今注稻之黏者為黍亦謂稌為黍禾之黏者為黍亦  
謂之稌亦曰黃黍

廣志黍有燕頷之名又有驢皮黍又曰牛黍稻尾秀成  
赤黍馬革大黑黍或云秬黍有濕屯黃黍  
齊民要術稌有赤白黑青黃鶯鵲凡五種

又凡黍黏者收薄稌味美者亦收薄難春

雜陰陽書黍生於榆六十日秀秀後四十日成黍生於  
巳壯於酉長於戌老於亥死於丑惡於丙午忌於丑寅  
卯稌忌於未寅

爾雅翼黍禾屬而黏者也以大暑而種故謂之黍從禾  
雨省聲孔子曰禾可為酒禾入水也然則又以禾入水  
三字合而為黍不但從雨而已黍以大暑而種故農家  
以三月上旬為上時四月上旬為中時五月上旬為下



時然月令仲夏之月農既登黍矣天子以雛嘗黍羞以  
含桃先薦寢廟為鄭說者以為黍非新成直是舊黍蓋  
以鄭解孟秋所登之穀為黍稷故以仲夏為未熟若其  
熟何得言登且所謂舊黍者自去歲孟冬與粢併食數  
月於此矣豈待今而後嘗耶黍固有早晚其晚者不妨  
至孟秋始熟故庶人秋乃薦黍此天子之禮自重其先  
熟者而嘗薦之耳故蔡邕以為今之蟬鳴黍亦猶十月  
獲稻而天子所嘗乃九月熟者謂之半夏稻亦其類也

黍之秀特舒散故說者以其象火為南方之穀詩亦云  
芄芃黍苗以此也又云彼黍離離彼稷之苗者黍大體  
似稷故古人併言黍稷今人謂黍為黍稷行役之人有  
憂於內則有不察於外故於此或不能辨也黍有赤黍  
黑黍黑黍已別見夢稱赤苗恐是赤者其類有黏不黏  
如稻之有粳糯其不黏者以為飯黏者別名秫以為酒  
說文秫稷之黏者即謂此也月令造酒命大酋秫稻必  
齊蓋以此秫與稻之糯為酒北人謂秫為黃米亦謂之

黃糯米酒比糯米差劣黍之為物黏而香故凡香之釀

醴黏之黏黍皆從之又古人作履黏以黍米謂之黎其

雪桃亦用黍以黍黏去桃毛也孔子先食黍以黍為五

穀之先桃為五果之下故捨不用耳黍又擣以為餠謂

之餠餠楚辭曰粃粃蜜餌有餠餠言以蜜和米麴煎熬

作粃粃又有美餠衆味甘具也及屈原死楚人以菰葉

裹黍祠之謂之角黍

黍音香黏音胡和音暉餠音張  
餠音黃粃音巨黍字典不載

又秬黑黍也古者薦籩有白黑形鹽白為熬稻黑即秬

也至藏冰則用黑牡秬黍以享司寒蓋此倣其方之色亦以為酒謂之秬鬯既芬香調暢矣若特用則鬯人以鬯酒入鬱人鬱人得之築鬱金草煮之以和此酒則謂之鬱鬯故鬯人掌共秬鬯而鬱人和鬱鬯以此也

又釋草曰秬黑黍秬一稊二米是秬與秬之所以異者在此然則秬必不黑秬必不一稊二米也而鄭氏釋春官鬯人既云秬如黑黍一稊二米則是以秬之狀雜之於秬郭氏解釋草又曰秬亦黑黍則是又以秬之色雜

之於秬秠既欲兼秬之狀秠又欲兼秬之色凡物之所  
以紊亂不復可推究者由此故也郭氏又引漢和帝時  
任城生黑黍或三四實實二米得黍三斛八斗以顯二  
米者為黑黍且任城所生漢之異事歷世所未有詩歌  
后稷降播乃民事之常如必待任城所生而後降之則  
沒世不可待矣至唐說者又言今上黨民間黑黍或值  
豐歲往往得二米者但稀濶而得之不以充貢耳以此  
附成郭氏之說且后稷所降既謂之種何得以豐歲偶

有一二為說若皆以豐歲言之則未有同穎麥有兩岐  
又可待以為種耶按今百穀之中一稔二米者唯麥為  
然舍麥未有二米者說文解秬亦云一稔二米詩云誕  
降嘉種維秬維秠天賜后稷之嘉穀也而解來字云周  
所受瑞麥來麴一來二縫秬與來麴皆后稷所受於天  
皆一稔二米則是秬者正此來麴耳但生民臣工所稱  
不同來麴又稱釐麴古者來釐丕三字相通要是一物  
鄭志自以所解鬯人不合釋草之文故答張逸併以秬

稭皆解為皮且云爾雅重言以曉人然則不惟二物相混而稭但得為稭之皮轉失實矣予故詳而論之

農政全書王禎曰詩云維秬維秠秬黑黍也又曰秬鬯一卣此言黍之為酒尚矣今又有赤黍米黃而黏可蒸食白黍釀酒亞於糯秫又北地遠處惟黍可生其莖穗低小可以釀酒又可作饌粥黏滑而甘此黍之有補於艱食之地者也凡祭祀以之為上盛貴其色味之美也本草綱目李時珍曰按許慎說文云黍可為酒從禾入

水為意也魏子才六書精蘊云禾下從余象細粒散垂之形汜勝之云黍者暑也待暑而生暑後乃成也詩云誕降嘉種維秬維秠維糜維芑糜即芻音轉也郭璞以芻芑為梁粟以秠即黑黍之二米者羅願以秠為來牟皆非也 陶弘景曰黍荊郢州及江北皆種之其苗如蘆而異於粟粒亦大今人多呼秠粟為黍非矣北人作黍飯方藥釀黍米酒皆用秠黍也別錄丹黍米即赤黍米也亦出北間江東時有而非土所宜多入神藥用又



有黑黍名秬釀酒供祭祀用

蘇恭曰黍有數種其苗

亦不似蘆雖似粟而非粟也

蘇頌曰今汴洛河陝間

皆種之爾雅云虜赤苗芑白苗秬黑黍是也李巡云秬  
是黑黍中一稊有二米者古之定律者上黨秬黍之中  
者累之以生律度量後人取他黍定之終不能協律  
或云秬乃黍之中者一稊二米之黍也此黍得天地中  
和之氣而生蓋不常有有則一穗皆同二米粒並均勻  
無大小故可定律他黍則不然地有肥瘠歲有凶穰故

米有大小不常矣今上黨民間或值豐歲往往得二米者但稀潤故不以充貢爾 又曰黏者為秣可以釀酒北人謂為黃米亦曰黃糯不黏者為黍可食如稻之有粳糯也李時珍曰此誤以黍為稷以秣為黍也蓋稷之黏者為黍粟之黏者為秣粳之黏者為糯別錄本文著黍秣稻糯之性味功用甚明而註者不諳往往謬誤如此今俗不知分別通呼秣與黍為黃米矣

又黍米氣味甘溫無毒孫思邈曰黍米肺之穀也肺病



縣物產黍黑白數種 新城縣物產黍白黍黎頭二種

齊河縣物產黍有紅黃白黑四種 齊東縣物產黍

黑白數種 長清縣物產黍有黑白二種 泰安州物

產黍黃白黑三種 萊蕪縣物產黍白黃紅黑四色有

軟硬二種軟宜釀酒 霑化縣物產黍之品黎頭黍托

地白棗皮黍芝黃黍紅黍白黍 滋陽縣物產黍有黑

白二種 曹州物產黍有黃紅黑白四色 曹縣物產

黍有數種五色早晚不同曹酒率用此米 鉅野縣物



宜釀酒 定襄縣物產黍黃白紅青羊眼 保德州土

產黍有黑青紅黃數種 臨汾縣物產黍有軟硬二種

丹黑二色 翼城縣物產黍有黃白二種 臨晉縣物

產黍有黃白赤黑四種米皆黃俗呼為黃米 平陸縣

土產黍有白紅黃黎其硬者為糜黍 高平縣物產黍

紅白黎黑數種精潔美腴甲於他郡 和順縣土產黍

有軟硬二種其色白黑黃赤黎五色 馬邑縣土產黍

有青白黃三種與早晚大小之分 祥符縣物產白黍

黑黍紅黍黃黍 涓川縣物產黍有黃白黑三種 鄆

陵縣土產黍紅白黎三色其最早者曰奪麥場 延津

縣物產黍有黃黍白黍秔黍糯黍 襄城縣土產白黍

白苧黃米為上黃黍黃苧黃米為次黑黍釀酒 延川

縣物產黍有軟硬二種有丹黑二色 西鄉縣土產黍

類露仁糧矮人糧馬尾糧黑穀糧單粒頭 清河縣物

產黍有黃白黎色數種亦有紅者名大紅袍 蒲圻縣

物產黍之屬有黃黍黑黍高粱黍 永明縣土產泡眼

黍赤黍蓂衣黍 建陽縣方產黍屬小早三月種六月  
收黃竹早宜飽水田四月種七月熟江西早三月種七  
月初收爛坭早天降早苦株早紅根早蘆絲早俱三月  
種七月收間有瘦田亦可種縮頸早宜肥田三月種七  
月半收福德早宜禾田三月種八月收半冬早黃穀早  
俱三月種九月收 海寧縣土產黍之種四曰糯黍黃  
黍牛黍飯黍





# 丹黍米



# 丹黍米

本草綱目丹黍米即赤黍也爾雅謂之薊吳瑞曰浙人呼為紅蓮米江南多白黍間有紅者呼為赤蝦米寇宗奭曰丹黍皮赤其米黃惟可為糜不堪為飯黏著難解甯原曰穗熟色赤故屬火北人以之釀酒作糕

又氣味甘微寒無毒孫思邈曰微溫寇宗奭曰動風性熱多食難消餘同黍米

# 蜀黍



# 蜀黍

齊民要術蜀秫春月種宜用下土莖高丈餘穗大如帚其粒黑如漆如蛤眼熟時收刈成束攢而立之其子作米可食餘及牛馬又可濟荒其莖可作洗帚稽稈可以織箔編席夾籬供爨無有棄者亦濟世之一穀農家不可闕也

農政全書徐光啓曰蜀秫古無有也後世或從他方得種其黏者近秫故借名為秫今人但指此為秫而不知

有梁秫之秫誤矣別有一種玉米或稱玉麥或稱玉蜀  
秫蓋亦從他方得種其曰米麥蜀秫皆借名之也又曰  
北方地不宜麥禾者乃種此尤宜下地立秋後五日雖  
水潦至一丈深而不能壞之但立秋前水至即壞故北  
土築堤二三尺以禦暴水但求隄防數日即客水大至  
亦無害也又曰秦中鹺地則種蜀秫下地種蜀秫特宜  
早須清明前後耩

減 鹺音

本草綱目李時珍曰蜀黍不甚經見而今北方最多按

廣雅荻梁木稷也蓋此亦黍稷之類而高大如蘆荻者  
故俗有諸名種始自蜀故謂之蜀黍汪穎曰蜀黍北地  
種之以備缺糧餘及牛馬穀之最長者南人呼為蘆稭  
李時珍曰蜀黍宜下地春月布種秋月收之莖高大許  
狀似蘆荻而內實葉亦似蘆穗大如帚粒大如椒紅黑  
色米性堅實黃赤色有二種黏者可和糯秫釀酒作餌  
不黏者可以作糕煮粥可以濟荒可以養畜梢可作帚  
莖可織箔席編籬供爨最有利於民者今人祭祀用以


代稷者誤矣其穀殼浸水色紅可以紅酒博物志云地種蜀黍年久多蛇

又蜀黍米氣味甘澀溫無毒





玉蜀黍



# 玉蜀黍

本草綱目李時珍曰玉蜀黍種出西土種者亦罕其苗  
葉俱似蜀黍而肥矮亦似薏苡苗高三四尺六七月開  
花成穗如秬麥狀苗心別出一苞如櫻魚形苞上出白  
鬚垂垂久則苞坼子出顚顚攢簇子亦大如稷子黃白  
色可漂炒食之炒拆白花如炒拆糯穀之狀  
又玉蜀黍米氣味甘平無毒

野黍



# 野黍

農政全書野黍生荒野中科苗皆類家黍而莖葉細弱穗甚瘦小黍粒亦極細小味甘性微溫搯子春去麤糠或搗或磨麪蒸餅食甚甜

欽定授時通考卷二十四

欽定四庫全書薈要卷一萬六百八十八

子部

欽定授時通考卷二十五


穀種

粟

白粟米

秣

粟





粟

尚書禹貢四百里粟

集傳粟穀也去其穗而納穀

周禮地官載師凡田不耕者出屋粟

疏夫三為屋民有百畝之田不耕墾種作者罰以三夫之稅粟

又旅師掌聚野之勑粟屋粟閒粟

註野謂遠郊之外也勑粟民相助作一井之中所出

九夫之稅粟也屋粟民有田不耕所罰三夫之稅粟  
閒粟閒民無職事者所出一夫之征粟訂義鄭諤曰  
耨粟者合耦於耨而不趨合耦之令者罰使出粟劉  
執中曰耨粟為有五畝之宅不耨而樹藝之乃出不  
毛之粟張氏曰屋粟不授田徙居之粟易氏曰閒粟  
即甸地閒田所出之粟曹氏曰此三等之粟在農民  
常賦之外旅師之所專掌

又舍人掌米粟之出入辨其物

疏太宰九職有九穀月令有五穀今止言粟即粱也  
爾雅釋草言粟粱稷也稷為五穀之長故特舉以配  
米也其實九穀皆有

又倉人掌粟入之藏

註九穀盡藏焉以粟為主疏案月令首種不入鄭注  
引舊記首種謂稷即種粟是五穀之長下辨九穀此  
云粟是以粟為主也訂義項氏曰倉人掌藏粟者李  
嘉會曰一歲所收粟則先熟兼中國之地率多種粟

蓋粟耐乾雖歲之旱不至太失此九穀之物必以粟而總其名

爾雅粢稷

註今江東人呼粟為粢疏左傳云粢食不鑿粢者稷也曲禮云稷曰明粢是也郭云今江東人呼稷為粢然則粢也稷也粟也正是一物而本草稷米在下品別有粟米在中品又似二物故先儒甚疑焉

春秋說題辭粟助陽扶性粟之為言續也粟五變一變


而以陽生為苗二變而秀為禾三變而祭然謂之粟四  
變入臼米出甲五變而蒸飯可食陽以一立為法故粟  
積大一分穗長一尺文以七烈精以五六立故其字為  
粟西者金所立米者陽精故西字合米字而為粟  
春秋佐助期粟神名許給姓慶天

說文粟嘉穀實也粟之為言續也續於穀也

廣志粟有赤粟白莖有黑格雀粟有張公班有含黃有  
蒼背稷有雪白粟亦名白粟又有白藍下竹頭青白遂

麥糲石精狗蟠之各種云

羣芳譜稗高三四尺似蜀秫稗中空有節細而矮葉似  
蘆小而有毛穗似蒲有毛顆粒成簇性鹹淡養脾胃補  
虛損益丹田利小便解熱毒陳者尤良壯人日用不可  
缺者

本草綱目李時珍曰粟古文作象穗在禾上之形而  
春秋題辭云粟乃金所立米為陽之精故西字合米為  
粟此鑿說也許慎云粟之為言續也續於穀也古者以

粟為黍稷粱秫之總稱而今之粟在古但呼為粱後人乃專以粱之細者名粟故唐孟詵本草言人不識粟而近世皆不識粱也大抵黏者為秫不黏者為粟故呼此為私粟以別秫而配私北人謂之小米者即此粟也

陶弘景曰粟江南西間所種皆是其粒細於粱熟舂令白亦當白粱呼為白粱粟或呼為粱米蘇恭曰粟類多種而並細於諸粱北土常食與粱有別粱有稷米陶註非矣孟詵曰粟顆粒小者是今人多不識之其粱米粒


麤大隨色別之南方多畚田種之極易春粒細香美少  
虛怯祇於灰中種之又不耬治故也北田所種多鋤之  
即難春不鋤即草翳死都由土地使然爾李時珍曰粟  
粱也穗大而毛長粒麤者為粱穗小而毛短粒細者為  
粟苗俱似茅種類凡數十有青赤黃白黑諸色或因姓  
氏地名或因形似時令隨義賦名故早則有趕麥黃百  
日糧之類中則有八月黃老軍頭之類晚則有雁頭青  
寒露粟之類按賈思勰齊民要術云粟之成熟有早晚



苗稈有高下收實有息耗質性有強弱米味有美惡山澤有異宜順天時量地利則用力少而成功多任性反道勞而無獲大抵早粟皮薄米實晚粟皮厚米少

又粟氣味鹹微寒無毒李時珍曰鹹淡寇宗奭曰生者難化熟者滯氣隔食生蟲陶弘景曰陳粟乃三五年者尤解煩悶服食家亦將食之

白粟米



# 白粟米

聖祖御製幾暇格物編粟米

本草粟米即小米

有黃白二種黃者

有粘有不粘本性注云粟粘者為秣匪人謂為黃米是也惟白粟則性皆不粘七年前烏喇地方樹孔中忽生白粟一科土人以其種播穫生生不已遂盈畝頃味既甘美性復柔和有以此粟來獻者朕命布植於山庄之內莖幹葉穗較他種倍大熟亦先時作為糕餌潔白如糯稻而細膩香滑殆過之想上古之各種嘉穀或先無

而後有者槩如此可補農書所未有也

直省志書遵化州物產粟早熟有趕麥黃中熟有四指紅晚熟有老米白土人總名曰穀 栢鄉縣物產粟有

黃穀黑穀白穀紅穀一薄蠶山藥穀一抱箭芝麻穀兒啼穀龍爪穀簍底籩 邢臺縣物產粟種類頗多其佳

者名十里香大黃穀小黃穀一把箭龍爪穀有一二十名 鄒平縣物產粟黃白私糯凡數十種 淄川縣物產粟其種甚多或紫莖或青莖春為米有黃白二色粟

之類又有梁穀黍穀 泰安縣物產粟百餘種曰九里  
香花裡黃其最佳者 萊蕪縣物產粟有黃白二色白  
米者名曰梁穀並黍穀米皆可釀酒 滋陽縣物產粟  
白赤二色 鄒縣物產粟有紅白二種 曹縣物產粟  
有黃黑紅白四色 沂州物產粟有黃白赤三色 高  
唐州物產粟其品三黃白紅 觀城縣物產粟黃白赤  
三種 黃縣物產粟其名數十種大約分黃白晚三種  
招遠縣物產粟其類凡數十大約分黃白烏晚四色

萊陽縣物產粟黃白晚三種 定襄縣物產粟黃白

硬軟二種黑紅二色 翼城縣物產粟有紅白二種

鄆陵縣土產粟類最夥其色有青白紅黃其名有六月  
先七里香八百光鐵壩齒皆嘉他如雞腸兔蹄龍爪猴  
尾隨象立名動以百計焉 延津縣物產粟有二種一  
種如狗尾南方謂之狗尾粟北方謂之小米一種五叉  
如爪南方謂之狗爪粟 渭南縣物產粟類頗多其佳  
者名狼尾又名紫羅帶又有金裹銀銀裹金者又有名

疾穀者晚種早熟其穗堅硬如鐵故又名鐵軸 西鄉

縣土產飯粟酒粟椒粟草粟薄地襯狗尾粟柳眼青猫

爪粟棕菱粟 宿松縣物產粟為青管為大黃為赶麥

黃為鹿脚紅為硃砂為蠟燭條為婆莫來有私有糯

歙縣物產粟有早粟寒粟毛粟皆晚成有赤桿白桿有

望杭青有糯粟山中人以為酒有罌子粟細美異他粟

有山粟皆古之梁也 祁門縣土產山粟圓粟 涇縣

物產徽粟寒粟有紅白二種糝子粟稗子粟 揚州府

物產粟有杭粟糯粟金釵婆不來鐵落索狗尾 上海

縣物產粟高鄉所種有蘆粟似薏苡而高有二種杭者

穗挺而疎糯者穗垂而密雞頭粟節間有赤鬚結實粟

累如珠一名珍珠粟又名天方粟又名玉麥又一種初

秋即熟其莖較短四月種八月熟 仁和縣物產粟有

杭粟糯粟狗尾金粟 山陰縣物產粳粟糯粟木粟桿

尖幾徑寸苗如蘆高丈餘粒比粟殊大皮黑性黏乳粟

粒大如雞豆色白味甘俗曰遇粟狗尾粟稌粟 新建



縣食貨粟之屬禾粟早粟 奉新縣土產粟種類凡數十早則有趕麥黃百日糧之類中則有黃老軍頭之類晚則有雁頭青寒露粟之類 靖安縣物產禾粟紅糯粟蘆粟黍子粟毛粟牛尾粟 武寧縣土產禾粟牛繩粟毛粟紅糯粟青桿粟寒粟承州粟觀音粟狗尾粟 寧州土產早粟紅粟鹿角粟馬口粟烏糯粟 建昌縣物產粟種類甚繁早則有大紅毛馬口齊頭白之類遲則有北粟毛蟲窠廬山白頭之類早者夏熟遲者冬熟

德化縣物產粟有早粟大粟草粟 東鄉縣物產禾

粟繩粟黏粟糯粟蘆粟 宜鄉縣物產粟有占粟糯粟

黍子粟草子粟等名 萍鄉縣物產大粟鬚粟膏粱粟

蒲圻縣物產早粟寒粟黏粟糯粟觀音粟 咸寧縣

物產鐵駝粟猴春粟鹿角粟寒粟觀音粟 羅田縣物

產粟類早粟大寒粟小寒粟青管粟矮腳紅穀子粟有

穀粟苧蔴粟濫雜九五龍爪下馬看料田槌趕麥黃九

月寒硃砂糯粟毛穀粟婆莫來銅鑼槌紅毛老軍頭白

毛老軍頭 寧鄉縣物產粟類三曰寒粟早粟糯粟

邵陽縣食貨秔粟糯粟米粟木粟火粟 永明縣物產

白范粟赤毛粟羊粟藍米粟私粟剷粟 嘉定州物產

粟有白沙黃沙黃者佳可以煮粥亦有酒粟其殼黑

建寧縣物產金釵粟狗尾粟 福寧州物產粟有牛毛

粟鷺掌粟狗尾粟 龍川縣物產粟有魚春牛尾老鴉

膽大米珍珠小黃

秫



# 秣

禮記月令仲冬之月乃命大酋秣稻必齊

## 爾雅衆秣

註謂黏黍也疏衆一名秣謂黏黍也說文云稷之黏者也與穀相似米黏北人用之釀酒其莖稈似禾而粗大者是也

廣志有胡秣早熟及麥


齊民要術按今世有黃粱穀秣桑根秣櫨天培秣也

本草綱目李時珍曰秫字篆文象其禾體柔弱之形俗呼糯米是矣北人呼為黃糯亦曰黃米釀酒劣於糯也又蘇恭曰秫稻秫也今人呼粟糯為秫北土多以釀酒而汁少於黍米凡黍稷粟秫粳糯三穀皆有私糯也掌禹錫曰秫米似黍米而粒小可作酒寇宗奭曰秫初搗出淡黃白色亦如糯不堪作飯最黏故宜作酒李時珍曰秫即梁米粟米之黏者有赤白黃三色皆可釀酒熬糖作饗糕食之蘇頌圖經謂秫為黍之黏者許慎說文

謂秣為稷之黏者崔豹古今注謂秣為稻之黏者皆悞也惟蘇恭以粟秣分私糯孫炎註爾雅謂秣為黏粟者得之

欽定授時通考卷二十五





總校官庶吉士 臣侍朝

校對官庶吉士 臣嚴福

謄錄監生 臣陸學稼

繪圖謄錄監生 臣勵守淳

欽定四庫全書薈要

子部

欽定授時通考卷二十六

七



詳校官主事臣陳本

欽定四庫全書薈要卷一萬六百八十九

子部

欽定授時通考卷二十六

穀種

麥

黑龍江麥

雀麥

燕麥

蕎麥



麥



# 麥

詩鄘風爰采麥矣沫之北矣

集傳麥穀名秋種夏熟者大全白虎通曰麥金也金旺而生火旺而死

周頌賄我來牟帝命率育

傳牟麥率用也注牟字書作𥽿音同或作𥽿孟子云  
𥽿大麥也廣雅云𥽿小麥𥽿大麥也疏孟子趙岐注  
云𥽿大麥也

禮記王制庶人夏薦麥麥以魚

集注麥與黍皆南方之穀故配以魚與豚皆陰物也  
月令仲秋之月乃勸種麥無或失時其有失時行罪無  
疑

注麥者接絕續乏之穀尤宜重之疏前年秋穀至夏  
絕盡後年秋穀夏時未登是其絕也夏時人民糧食  
缺短是其乏也麥乃夏時而熟是接其絕續其乏也  
周禮天官食醫凡會膳食之宜鴈宜麥



正義鴈味甘平大麥味酸而溫小麥味甘微寒氣味  
相成訂義鴈陽也麥秋種而夏熟得陽氣為多與鴈  
相宜

夏官職方氏正東曰青州其穀宜稻麥

尚書大傳秋昏虛星中可以種麥

春秋說題辭麥之為言殖也寢生觸凍而不息精射刺  
直故麥含芒事且立也

春秋佐助期麥神名福習

孝經援神契黑墳宜黍麥

大戴禮記三月祈麥實麥實者五穀之先見者故急祈而祀之也

又九月鞠華而樹麥時之急也

淮南子濟水通和而宜麥

說文麥金也金王而生火王而死 麥芒穀秋種厚藿

故謂之麥從來有穗者從久 麩周所受來牟也一麥

二縫象其芒刺之形天所來也 麩堅麥也 麩小麥

屑穀也麴磨麥也

麴麥穀屑也十斤為三斗從麥當

聲

麴煮麥也

麴麥甘粥也

稍麥莖也

廣志稅麥似大麥出涼州旋麥三月種八月熟出西方  
赤小麥赤而肥出鄭縣有半夏小麥有秀芒大麥有黑  
穰麥

齊民要術爾雅曰大麥麴小麥麴廣志曰鹵水麥其實  
大麥形有縫稅麥似大麥出涼州旋麥三月種八月熟  
出西方赤小麥赤而肥出鄭縣語曰湖豬肉鄭稀熟山

提小麥至粘弱以貢御有半夏小麥有禿芒大麥有黑  
積麥陶隱居本草云大麥為五穀長即今保麥也一名  
麩麥似穰麥惟無皮耳穰麥此是今馬食者然則大穰  
二麥種別名異而世人以為一物誤矣按世有落麥者  
禿芒是也又有春種穰麥也

雜陰陽書大麥生於杏二百日秀秀後五十日成麥生  
於亥壯於卯長於辰老於巳死於午惡於戌忌於子丑  
小麥生於桃二百一十日秀秀後六十日成忌與大麥

同蟲食杏者麥貴

種樹書小麥忌戌大麥忌子

又鵬日種麥及豆來年必熟麥苗盛時須使人縱牧於其間令稍實則其收倍多麥屬陽故宜乾原稻屬陰故宜水澤

又小麥不過冬大麥不過年

又麥最宜雪諺云冬無雪麥不結

爾雅翼麥者接絕續乏之穀夏之時舊穀已絕新穀未

登民於此時乏食而麥最先熟故以為重董仲舒曰春  
秋於他穀不書至於麥禾則書之以此見聖人於五穀  
最重麥與禾也因說武帝勸關中種麥而明堂月令亦  
有仲秋勸種麥之文凡以接續所賴懼民不以為意耳  
又禾下即種為稍勞故鄭司農注稻人稱今時謂禾下  
麥為萁下麥言萁萁其禾於下種麥又注薶氏云俗間  
謂麥下為萁言萁萁其麥以其下種禾豆則是卒歲之  
間無曠土閒民此情農所難故勸之麥比他穀獨隔歲

種故號宿麥說者亦或以為首種傳曰秋昏虛星中可  
以種麥說文曰麥芒穀秋種厚葬故謂之麥秋種冬長  
春秀夏實具四時之氣自然兼有寒溫熱冷故小麥微  
寒以為麴則溫麴熱而麯冷其地暖處亦可春種至夏  
便收然比秋種者四氣不足故有毒河渭以西白麥麴  
涼以其春種缺二時氣使然也麥既備有四時之氣而  
說文以麥為金者特以其金王而生又遇火而死鄭注  
月令則云麥實有字甲屬木此據明堂月令四時與中

中央所食為說養生家則以為麥心之穀養心氣心病宜食是又以為南方之穀皆各自為義然麥性微寒以為金則許氏之說優矣古稱高田宜黍稷下田宜稻麥今小麥例須下田故古歌有曰高田種小麥終久不穗若大麥則不然詩所謂青青之麥生於陵陂者謂大麥也古者朝事之豆有麴蕡先儒以麴為熬麥許叔重以為煮麥又小麥屑皮謂之麴小麥屑之麴謂之麴麥麴屑十觔為三斗者謂之麴麥末謂之麴麥甘粥謂之麴餅



籩謂之麥若麩麩確麥若擣謂之麩堅麥謂之麩又相  
謁食麥謂之飴陳楚之間謂之餅楚人謂之餅秦人謂  
之饅饅

又麩者周所受瑞麥來麩也一作牟又作麥即今之大  
麥也說文云牟大也孟子曰今夫麩麥播種而耰之其  
地同樹之時又同勃然而生至於日至之時皆熟矣此  
麩之候也呂氏春秋曰孟夏之月百穀三葉而穫大麥  
其始蓋后稷受之於天故詩曰貽我來牟又曰於皇來

牟劉向以為釐麴麥也始自天降皆以和致和獲天助也然則來麴一物惟廣雅以麴為大麥來為小麥按說文云來周所受瑞麥來麴一來二縫象芒刺之形天所來也故謂行來之來說文以此解來則來麴不應為二物然則來麴為大麥明矣后稷憂勤萬民天賜之麥蓋使其麥豐稔則謂之貽我來牟耳不必雨之種也然古今雨粟事亦甚多安知其始不如此乎雖然后稷所植多矣而獨言此者以其至艱書曰暨稷播奏庶艱食鮮

食今麥早種則蟲而有節晚種則穗小而少實又為性  
多穢一種之終歲不絕耘耨之功此所以為艱食歟方  
言曰饔麴麴麴麴麴麴也自關而西秦豳之間曰饔  
晉之舊都曰麴齊右河濟曰麴或曰麴北鄙曰麴麴其  
通語也蓋大麥以為麴還得麴之本名麴是小麥為之  
麴細餅麴也麴有衣麴也大麥宜為飯又可為酢其葉  
可為餲

本草綱目小麥李時珍曰來亦作稊許氏說文云天降

瑞麥天所來也如足行來故麥字從來從夕夕音緩足  
行也詩云貽我來牟是矣又云來象其實夕象其根梵  
書名麥曰迦師錯

又李時珍曰北人種麥漫撒南人種麥撮撒北麥皮薄  
麴多南麥反此

又小麥氣味甘微寒無毒李時珍曰新麥性熱陳麥平  
和

又李時珍曰北麴性溫食之不渴南麴性熱食之煩渴

西邊麴性涼皆地氣使然也按李廷飛延壽詩云北多霜雪故麴無毒南方雪少故麴有毒顧元慶簷曝偶談云江南麥花夜發故發病江北麥花晝發故宜人又且魚稻宜江淮羊麴宜京洛亦五方有宜有不宜也

又大麥李時珍曰麥之苗粒皆大於來故得大名牟亦大也通作麴

又蘇恭曰大麥出關中即青稞形似小麥而大皮厚故謂大麥不似穰麥也蘇頌曰大麥今南北皆能種時穰

麥有二種一種類小麥而大一種類大麥而大陳藏器  
曰大穰二麥前後兩出穰麥是連皮者大麥是麥米但  
分有殼無殼也蘇以青稞為大麥非矣青稞似大麥天  
生皮肉相離秦隴巴西種之今人將大麥米糶之不能  
分也陳承曰小麥今人以磨麪日用者為之大麥今人  
以粒皮似稻者為之穰麥今人以似小麥而大粒色青  
黃汁洛河北之間又呼為黃稞關中一種青稞比近道  
者粒微小色微青然大穰二麥其名差互今之穰麥似

小麥而大者當謂之大麥今之大麥不似小麥而穰脆者當謂之穰麥不可不審李時珍曰大穰二麥註者不一按吳普本草大麥一名穰麥五穀之長也王禎農書云青稞有大小二種似大小麥而粒大皮薄多麴無麩西人種之不過與大小麥異名而已據此則穰麥是大麥中一種皮厚而青色者也大抵是一類異種如粟粳之種近百總是一類但方土有不同耳大麥亦有粘者名糯麥可以釀酒

又大麥氣味鹹溫無毒

又穰麥李時珍曰穰之殼厚而粗穰也

又蘇頌曰穰麥即大麥一種皮厚者陳藏器謂即大麥之連殼者非也

又穰麥氣味甘微寒無毒

天工開物凡麥有數種小麥曰來麥之長也大麥曰牟曰穰雜麥曰雀曰蕎皆以播種同時花形相似粉食同功而得麥名也四海之內燕秦晉豫齊魯諸道蒸民粒



食小麥居半而黍稷稻粱僅居半西極川雲東至閩浙  
吳楚腹焉方長六千里中種小麥者二十分而一種餘  
麥者五十分而一種麥獨產陝西一名青稞即大麥隨  
土而變而皮成青黑色者雀麥細穗穗中又分十數細  
子間亦野生蕎麥實非麥類然以其為粉療饑傳名為  
麥則麥之而已凡北方小麥歷四時之氣自秋播種明  
年初夏收南方者種與收期時日差短江南麥花夜開  
江北麥花晝發亦一異也大麥種穫期與小麥同蕎麥

則秋半下種不兩月而即收其苗遇霜即殺邀天降霜遲遲則有收矣

閩書麥廣雅曰大麴也小稊也本草云北方之麥秋種冬長春秀夏實全備四時之氣故無毒南方之麥冬種夏實四時之氣不備故有毒有大麥有小麥有蕎麥稈紅花白實三稜而黑秋花冬實有穰麥類麥而殼稍異福州曰米麥泉州曰蔚麥興化曰穰麥福寧曰玉麥惟穰為古名



黑龍江麥



## 黑龍江麥

聖祖御製幾暇格物編黑龍江所產之麥最佳色潔白性復宜人相傳中國麥種之佳者係西域攜來鄂羅斯地在西陲萬里有餘黑龍江之上流原係鄂羅斯所居其種亦自西來所以麥之佳較他處尤勝也

直省志書宛平縣物產有三種大小蕎 良鄉縣物產大麥小麥春麥雁麥蕎麥 固安縣土產麥大小穰無芒蕎 清苑縣土產麥有大有小有蕎有春有秋有米

有玉 栢鄉縣物產米大麥芒大麥小麥火麥紅麥白

麥蕎麥 邢臺縣物產麥有五種大麥冬種者春種者

皮粗而粒大成米謂之大麥仁止可炊飯食之佳小麥

有黃皮麥有紅麥白麥光頭麥紫庭白籽實麥縣西北

先熟東南次之西山中又次之上下熟差十日 歷城

縣方產小麥有白有紫白者粒肥而佳大麥穗有六稜

者為六稜麥露仁者為青穎麥宜飯醋蘖宜餉有春秋

兩名種宜畦中濕地玉麥蕎麥入伏種霜前收可佐二

麥之歟 新城縣物產大麥小麥時麥三種蕎麥 齊

東縣物產大麥小麥蕎麥春麥 泰安州物產麥有麩

薥蕎三種 萊蕪縣物產麥有大小二種白紅二色春

種者曰春麥薥麥又有蕎麥夏三伏內種 濱州物產

麥有大麥小麥蕎麥新增一種曰轉蔓麥 城武縣物

產麥有紅白二種 曹州物產大麥小麥小麥有紅白

二種蕎麥有白色一種 昌邑縣物產麥有大小春玉

蕎五種 定襄縣物產大麥小麥蕎麥油麥燕麥 翼

城縣物產麥有大小赤白數種 平陸縣土產麥有大

小二種大麥則曰露仁曰草大麥小麥則曰火麥曰白  
麥 絳州物產麥之屬大麥有芒芽可為飴糖小麥有  
芒無芒種甚多蕎麥燕麥炒以為饌可食 和順縣土

產麥春麥雪麥太麥地寒不多種油麥性寒多種當五  
穀之半 馬邑縣土產麥有小大二種俱春分前種之  
去秋無雨則地燥而不能下種春無雨則不苗夏無雨  
則不秀大麥刈於小暑小麥刈於大暑與雁門以南迥



不同焉外有蕎麥一種初伏乃種霜早則盡萎又油麥一種亦秋熟而種之者少

祥符縣物產芒大麥紅小

麥蕎麥米大麥白小麥

太康縣物產小麥大麥米大

麥山大麥

洧川縣物產麥有大麥小麥裕麥數種

鄆陵縣土產麥秋種亦有春種者大麥三月黃嘉小麥

自黃皮蠟子之外有白麥御麥為最嘉其他曰紅稈曰

鐵稈曰光頭曰條兒之類難以悉舉

延津縣物產麥

麴麥晚麥短稈春麥赤鬚盧麥北麥

襄城縣土產芒

大麥後種先熟米大麥亦可釀酒芋麥煮仁作飯最佳  
小麥襄土第一奇種耐旱多收八九月種者為上蕎麥  
俗名陪麥 永寧縣物產麥有大小腴雁四種 咸陽  
縣物產小麥有芒麥有無芒麥為和尚麥色白者為白  
麥色紫者為紫麥早熟者為三月黃生畢原者上品大  
麥穗有六稜者為六稜麥有露仁者為青稞俱可釀酒  
渭南縣物產麥有三種小麥出渭河北者粒小食之  
易化河以南者粒差大而色不光鮮然一種名三月黃

者先諸麥熟細膩潔白河北弗如也大麥皮粗粒大煮食之佳謂之大麥仁蕎麥作麪不甚佳可備諸穀之不熟乾州物產小麥皮薄麪多佳於他處每斗更重二觔平涼縣物產番麥一曰西天麥苗葉如葛稈而肥短末有穗如稻而非實實如塔如桐子大生節間花垂紅絨在塔末長五六寸三月種八月收西涼縣土產大麥黑大麥番麥燕麥冷山麥換香頭班鳩早大幹麥裏周全紅花麥芝蔴麥西番麥白麥甜莖麥苦莖麥青

穎麥竹根早紅麥

六合縣物產麥之屬大麥有糯者

可以釀酒磨麴作醬亦甘美管麥大麥之無芒者麴與

小麥同造醬甘美

歙縣物產大麥有高麗麥有糯麥

為飯亦宜小麥有長穰麥麴厚而麴少有白麥麴亦少

有赤穀麥麴少而麴多

太平府物產大麥五種白大

麥一名牟麥長粒長芒稭粘於粒管麥即無芒大麥落

稭稭自退六稜中早紅粘三種舊志所載今無小麥七

種白小麥稭白芒短長關小麥黃白稭芒長排子小麥

黃白稭芒短和尚小麥一名火燒麥黃白稭無芒早白  
松浦娜麥三種舊志所載今無 清河縣物產有麴有  
麥皆芒穀玉麥無芒火麥色赤而早熟猶嶺南有火米  
也又有穰麥麥之似麴者亦早熟 高郵州物產大麥  
有數種麴麥晚麥淮麥短稈小麥有數種春麥蘆麥北  
麥短管赤穀白穀蕎麥有苦甜二種 通州物產麥有  
大小並早晚二色元麥俗呼為穠三月熟者糯帶青炒  
食似新蠶又稭者曰舜麥色稍赤 吳縣物產麥之屬

大麥小麥穠麥蕎麥舜哥麥紫稈麥西番麥形似稷而  
枝葉大結子纍纍如芡實 常熟縣物產小麥有紫稈  
長莖舜哥火燒頭數種 太倉州物產麥有三一曰大  
麥其早者皮厚有芒其晚收皮薄無芒者曰老脫鬚一  
曰小麥早者曰抄梅言抄在黃梅前也中有火燒頭晚  
收長穗白殼有芒者曰百脚麥一曰稈麥俗呼穠麥微  
分粳糯紅曰紅穠紫曰紫穠性軟宜食但磨粉較少青  
曰青穠白曰白穠性硬磨多粉又一種曰綠樹青大約

大麥小麥遍處皆有穠麥惟吳中盛州地高比他邑獨  
壘然小麥總不及北地 上海縣物產大麥小麥赤麥

有早晚二種白麥亦有二種白穠麥俗名圓麥有赤白  
二種蕎麥立秋前後下種八九月收刈舜哥麥俗名火  
燒頭火燒麥無芒雀麥一名燕麥 靖江縣食貨麥之

屬大麥有早晚二色有四稜有六稜小麥亦早晚二色  
有舜哥紫稈梅前黃有盧簪頭火燒頭諸名圓麥俗呼  
為穠又稷者曰舜麥 丹徒縣物產麥有大小大麥之

種二曰春曰黃稈小麥之種三曰赤殼曰白殼曰宣州

平湖縣物產麥有赤剝麥無芒穀 天台縣物產小

麥大麥矮赤長稈赤麥光頭皆小麥類稞麥穰麥皆大  
麥類 上高縣物產米大麥穀大麥紫色麥白色麥

新寧縣物產麴麥穀麥晚姑娘麥甜蕎麥苦蕎麥 泉

州府物產麥之屬大麥有一種名曰早黃大麥一種名


烏肚麥米肚青色名青大麥鬱麥穀薄易脫故名五葉

麥 同安縣物產麥芒粒稀鬆早熟者曰早黃白者曰



秣麥穗大顆稠密者曰松蕾麥初熟時人多炒而食之  
有火能生熱病番麥狀如薏苡以

雀麥



# 雀麥

爾雅薈雀麥


注即燕麥也疏薈一名雀麥一名燕麥本草云生故墟野林下苗似小麥而弱實似穰麥而細

農政全書雀麥本草一名燕麥一名薈生於荒野林下今處處有之苗似燕麥而細弱結穗像麥穗而極細小每穗又分作小叉穗十數個子甚細小味甘性平無毒本草綱目雀麥一名杜姥草一名牛星草李時珍曰此

野麥也燕雀所食故名曰華本草謂此為瞿麥者非矣  
又寇宗奭曰苗與麥同但穗細長而疎唐劉夢得所謂  
兔葵燕麥動搖春風者也



鷺麥



驚麥

農政全書燕麥田野處處有之其苗似麥攬莖但細弱  
葉亦瘦細拈莖而生結細長穗其麥粒細小味甘

蕎麥

金匱要略通串  
卷二十六





# 蕎麥

農政全書蕎麥今處處有之苗高二三尺許就地科又生其莖色紅葉似杏葉而軟微觶開小白花結實作二蒴味甘平性寒無毒

羣芳譜蕎麥一名莖麥一名烏麥一名花蕎

本草綱目李時珍曰蕎麥之莖弱而翹然易長易收磨麩如麥故曰蕎曰莖而與麥同名也俗亦呼為甜蕎以別苦蕎楊慎丹鉛錄指烏麥為燕麥蓋未讀日用本草

也

又李時珍曰蕎麥南北皆有立秋前後下種八九月收刈性最畏霜苗高一二尺赤莖綠葉如烏格樹葉開小白花繁密粲粲然結實累累如羊蹄實有三稜老則烏黑色王禎農書云北方多種磨而為麪作煎餅配蒜食或作湯餅謂之河漏以供常食滑細如粉亞於麥麪南方一種但作粉餌食乃農家居冬穀也

又蕎麥氣味甘平寒無毒孫思邈曰酸微寒食之難消

久食動風令人頭眩

欽定授時通考卷二十六